



REPUBLICA E KOSOVËS REPUBLIKA KOSOVA REPUBLIC OF KOSOVO
KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

Pranuar / Dostigjen / Prilbjen / Prezentir / Received / Dostigjen /	01.06	2022	2	viti god year
Organ / Njësia / Organ / Zvornica / Org. / Unit	SKM/SHCK	3208/2022	1/4	nr. nr. no.
Titulli / Titulli / Titulli /				
Shtet / Shtet / Shtet /				
Shtet / Shtet / Shtet /				
Shtet / Shtet / Shtet /				



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.399/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Arben Mehmeti-kryetar, Ardita Haxhnikaj-Demi dhe Jeton Koca-anëtarë, si dhe Sabile Avdyli-Zyrtare e Lartë për Bashkëpunim Profesional në cilësinë e procesmbajtëses, ka shqyrtuar ankesën me numër A.nr.399/2022 të datës 19.04.2022, të parashtruar nga ankuesi të cilin me autorizim e përfaqëson kompania me avokat dhe kundër Vendimit me Nr.07/69 të datës 13.04.2022 të Qeverisë së Republikës së Kosovës, në çështjen juridike “ndërprerje e marrëdhënies së punës”, duke vepruar në pajtim me nenin 6 paragrafin 1 nënparagrafin 1.1, neni 16 paragrafi 3 dhe nenin 18 paragrafin 1 nënparagrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, të mbajtur me datën 01.06.2022, mori këtë:

V E N D I M

- I. Refuzohet si e pabazuar ankesa me numër A.nr.399/2022 e datës 19.04.2022, e parashtruar nga ankuesi
- II. Mbetet në fuqi Vendimi me Nr.07/69 i datës 13.04.2022 i Qeverisë së Republikës së Kosovës.

A r s y e t i m

Ankuesi përfaqësuar përmes kompanisë, me datë 19.04.2022 ka parashtruar ankesë me numër protokollit 2205/2022 në Këshillin e Pavarur Mbikëqyrës për Shërbimin Civil të Kosovës, kundër Vendimit me Nr.07/69 të datës 13.04.2022 të Qeverisë së Republikës së Kosovës, me pretendimet ankimore se vendimi është nxjerr me shkelje procedurale dhe materiale.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Rregullores Nr.02/2018 për Rregullat dhe Procedurat e Ankesave në Këshillin e Pavarur Mbikëqyrës për Shërbimin Civil të Kosovës, më datë 27.04.2022 ka dërguar kërkesën për përgjigje në ankesë të ankuesit tek Ministria e Punëve të Brendshme, ndërsa Ministria e Punëve të Brendshme më datë 13.05.2022 ka dërguar provat lidhur me lëndën.



Kolegji për Shqyrtimin dhe Vendosjen e Ankesave, ka administruar këto prova: Ankesën me numër të protokollit 2205/2022 të datës 19.04.2022 e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Autorizimin i nënshkruar nga ankuesi; Vendimin me Nr.07/69 të datës 13.07.2022 i Qeverisë së Republikës së Kosovës; Vendimin me numër Nr.08/137 të datës 03.07.2013 nga Qeveria e Republikës së Kosovës; Vendimi me nr.02/17 i datës 22.01.2020 i Qeverisë së Republikës së Kosovës; Vendimi me nr.04/22 i datës 23.12.2016 i Qeverisë së Republikës së Kosovës; Përgjigje në ankesë e datës 13.05.2022 nga organi i punësimit me numër protokollit 2783/2022 bashkë me shkresat e lëndës faqe 1/21 dhe Përgjigje në ankesë e datës 12.05.2022 me nr.769/2022 e përgatitur nga udhëheqësi i Njesisë për Menaxhimin e Burimeve Njerëzore në Ministrinë e Punëve të Brendshme;

Kolegji për Shqyrtimin dhe Vendosjen e Ankesave pas shqyrtimit dhe analizimit të provave të lëndës, konstatoi se ankesa e ankuesit **është e pabazuar, SEPSE:**

Nga administrimi i shkresave të lëndës rezulton se ankuesi me Vendimin Nr.09/160 të datës 11.12.2013 të Qeverisë së Republikës së Kosovës ishte emëruar në pozitën Drejtor i Përgjithshëm i Agjencisë për Shoqërinë e Informacionit në kuadër të Ministrisë së Administratës Publike, me mandat tre (3) vjeçar. Të njëjtit me Vendimin Nr.04/122 të datës 23.12.2016 të Qeverisë së Kosovës i është vazhduar mandati i dytë për pozitën e Drejtorit i Përgjithshëm i Agjencisë për Shoqërinë e Informacionit për periudhën tri (3) vjeçare respektivisht deri me datë 23.12.2019.

Qeveria e Kosovës duke u bazuar në propozimin e Ministrit të Ministrisë së Administratës Publike, sërish me Vendimin Nr.03/117 të datës 22.01.2020, ankuesit i vazhdon mandatin e tretë po me kohëzgjatje prej tri (3) viteve, në pozitën e Drejtorit të Përgjithshëm të Agjencisë për Shoqërinë e Informacionit në Ministrinë e Administratës Publike.

Në mbledhjen e mbajtur më datë 13.04.2022, Qeveria e Republikës së Kosovës ka nxjerrë Vendimin Nr.07/69, me të cilin ka shfuqizuar Vendimin Nr.03/117 të datës 22.01.2020 për vazhdimin e mandatit të ankuesit në pozitën e Drejtorit të Përgjithshëm të Agjencisë për Shoqërinë e Informacionit, me arsyetimin se ky vendim është nxjerrë në kundërshtim me dispozitat e Ligjit Nr.03/L-149 për Shërbimin Civil të Kosovës dhe Rregullores Nr.06/2012 për Pozitat e Larta Drejtuese në Shërbimin Civil të Republikës së Kosovës, dhe në këtë mënyrë ankuesit i ka ndërprerë marrëdhënien e punës në shërbimin civil.

Ankuesi në ankesën e tij të parashtruar në Këshillin e Pavarur Mbikëqyrës për Shërbimin Civil, pretendon se Vendimi Nr.07/69 i datës 13.04.2022 i Qeverisë së Republikës së Kosovës është nxjerr me shkelje të dispozitave procedurale dhe materiale. Më tej thekson se rizgjatja e mandatit të ankuesit sipas Vendimit Nr.03/117 të datës 22.01.2020, është bërë në pajtueshmëri me dispozitat ligjore për Shërbimin Civil të cilat kanë qenë në fuqi, respektivisht Ligjin Nr.03/L-149 për Shërbimin Civil të Republikës së Kosovës dhe Rregulloren Nr.06/2012 për Pozitat e Larta Drejtuese në Shërbimin Civil të Republikës së Kosovës, me ç'rast propozon që Këshilli ta aprovoj ankesën si të bazuar, ta anuloj Vendimin Nr.07/69 të datës 13.04.2022 të Qeverisë së Republikës së Kosovës, duke lenë në fuqi Vendimin Nr.03/117 të datë 22.01.2020.

Kolegji për Shqyrtimin dhe Vendosjen e Ankesave nga shqyrtimi i provave të lëndës ka gjetur se emërimi dhe zgjatja e mandateve të ankuesit në pozitën e pozitën e Drejtorit të Përgjithshëm të Agjencisë për Shoqërinë e Informacionit, është bërë në mbështetje të dispozitave të Ligjit Nr.03/L-149 për Shërbimin Civil të Kosovës, si ligj i zbatueshëm në atë kohë, andaj edhe trajtimi i çështjes në ankesë bazohet në dispozita e këtij ligji dhe akteve nënligjore referuar zbatimit të tij.

Bazuar në përcaktimin ligjor sipas nenit 7 paragrafi 1 nën paragrafi 1.3 të Rregullores Nr.05/2012 për Klasifikimin e Vendeve të Punës në Shërbimin Civil, Kolegji ka konstatuar se pozita e Drejtorit të Përgjithshëm të Agjencisë për Shoqërinë e Informacionit, hynë në kategorinë pozitive të shërbimit civil të nivelit të lartë drejtues.

Kolegji për Shqyrtimin dhe Vendosjen e Ankesave në funksion të shqyrtimit të pretendimeve të ngritura në ankesë, ka analizuar nenin 15 të Ligjit Nr.03/L-149 për Shërbimin Civil të Kosovës me të cilin përcaktohej se: *Sekretarët e përgjithshëm dhe pozicionet e barasvlershme me ta zgjidhen nga një listë e nëpunësve civilë të klasifikuar në pozitën e larta drejtuese dhe pozitën drejtuese sipas rregullave për klasifikimin e pozitave të përcaktuara nga ky ligj, ose në pozitën e tjera të barasvlershme në institucionet e administratës publike ose kompanitë publike dhe private, të cilët janë kandidatë për pozitën përkatëse, e cila përpilohet në bazë të aplikacioneve të pranuar pas shpalljes së një konkursi publik. 2. Ministria përgjegjëse për administratë publike formon Komisionin për vlerësimin e kritereve (Komisioni) i cili përbëhet nga tre (3) sekretarë të përgjithshëm, një (1) profesor fakulteti nga lëmia përkatëse, dhe një (1) anëtar nga shoqëria civile. Titullari i institucionit ku është vendi i lirë, cakton dy (2) nga anëtarët e Komisionit 3. Komisioni zhvillon procedurën e konkurrimit dhe në fund të saj i propozon ministrisë përgjegjëse për administratë publike tre (3) kandidaturat më të mira. Ministria përgjegjëse për administratë publike ia dërgon titullarit të institucionit për miratim (3) kandidaturat më të mira. Për institucionet e ekzekutivit, Ministria përgjegjëse për administratë publike i propozon Qeverisë për miratim kandidatin e preferuar nga titullari i institucionit, i cili miratohet nga Qeveria në pozicionin përkatës për një mandat tre (3) vjeçar. Për institucionet jashtë ekzekutivit, titullari i institucionit për zgjedh një (1) nga tre (3) kandidatët e propozuar nga Komisioni. 4. Procedurat e hollësishme për emërimin në pozitën e larta drejtuese përcaktohen me rregullore të veçantë të nxjerrë nga Qeveria.*

Po ashtu Kolegji ju referua edhe Rregullores Nr.06/2012 për Pozitat e Larta Drejtuese në Shërbimin civil të Republikës së Kosovës, rregullore në fuqi në kohën e vazhdimin të mandatit të tretë, konkretisht nenit 22 ku thuhet se: 1. *Nëse pas tri (3) vitesh Ministri e konsideron të kënaqshme performancën e zyrtarit të lartë drejtues, atëherë ai/ajo i drejtohet Këshillit të bashku me një arsyetim për vazhdimin e kontratës së zyrtarit të lartë për një mandat tjetër tre (3) vjeçar. Këshilli pas vlerësimit të kërkesës së ministrit dhe performancës së tri viteve të kaluara i propozon Qeverisë që të votohet për vazhdimin e kontratës së Zyrtarit të lartë drejtues. 2. Vazhdimi i kontratës së zyrtarit të lartë drejtues duhet të bëhet me vendim të Qeverisë pas rekomandimit nga Këshilli. Rrjedhimisht, në kuptim të këtyre dispozitave ligjore dhe duke u bazuar në shkresat e lëndës, Kolegji ka konstatuar se Rekomandimi i Këshillit për Pozita të Larta Drejtuese si dhe Vendimi Nr.03/117 i Qeverisë së Kosovës për vazhdimin e mandatit të tretë të ankuesit në pozitën e Drejtorit të Përgjithshëm të Agjencisë për Shoqërinë e Informacionit, janë nxjerrë me datën 22.01.2020, respektivisht rekomandimi dhe vazhdimi i mandatit në fjalë për ankuesin janë bërë pasi që të njëjtit i ka përfunduar mandati i tij i dytë me datë 23.12.2019 sipas Vendimit Nr.04/122 të datës 23.12.2016 pra pas një (1) muaji. Andaj, nisur nga ky konstatim dhe në mbështetje të bazës ligjore si me lartë, rrjedhë se me përfundimin e mandatit të ankuesit sipas Vendimit Nr.04/122 të datës 23.12.2016, i njëjti e ka humbur statusin e zyrtarit të lart drejtues respektivisht Drejtorit të Përgjithshëm të Agjencisë për Shoqërinë e Informacionit dhe se në rastin konkret nuk ka mundur të behët ri zgjatja e mandatit të ankuesit në pozitën e Drejtorit të*

Përgjithshëm të Agjencisë për Shoqërinë e Informacionit, pasi që pozita në fjalë me qenë se nuk janë respektuar procedurat ligjore me rastin e zgjatjes së mandatit është bërë pozitë e lirë dhe se e njëjta është dashur të plotësohet në pajtim me dispozitat ligjore të përcaktuara me nenin 15 të Ligjit Nr.03/L-149 për Shërbimin Civil të Kosovës dhe nenet 13, 14 dhe 15 të Rregullores (QRK)-Nr.17/2018 për Procedurat e Emërimit në Pozita të Larta Drejtuese në Shërbimin Civil të Republikës së Kosovës të cilat ishin me fuqi ligjore në këtë periudhë.

Kolegji në kuptim të vlerësimit të ligjshmërisë së vendimit të goditur me ankesë, ju referua edhe dispozitave të Ligjit Nr.05/L-031 për Procedurën e Përgjithshme Administrative konkretisht nenit 52 ku përcaktohet se: *Një akt administrativ është i paligjshëm nëse:... është rezultat i shkeljes të dispozitave lidhur me procedurën administrative; ...është në kundërshtim me ligjin material;* dhe rrjedhimisht duke marrë parasysh konstatimin si me lart, Vendimi Nr.02/117 i datës 22.01.2020 i Qeverisë së Kosovës për vazhdimin e mandatit të tretë të ankuesit në pozitën e Drejtorit të Përgjithshëm të Agjencisë për Shoqërinë e Informacionit, është nxjerrë në kundërshtim me dispozita ligjore të lartë cekura, Kolegji konstaton se Qeveria e Kosovës me rastin e nxjerrjes së Vendimit Nr.07/69 të datës 13.04.2022, ka vepruar në pajtim me nenin 53 paragrafi 1 dhe nenin 55 paragrafi 1 të Ligjit Nr.05/L-031 për Procedurën e Përgjithshme Administrative, e mbi këto arsye rezulton se janë të pabazuara pretendimet ankimore të ankuesit se vendimi i kundërshtuar me ankesë është nxjerrë me shkelje ligjore dhe procedurale.

Andaj, pas analizimit dhe shqyrtimit të shkresave të lëndës, si dhe duke u bazuar në nenin 132 paragrafi 2 i Ligjit Nr.05/L-031 për Procedurën e Përgjithshme Administrative si dhe nenin 18 paragrafi 1 nën paragrafi 1.1 të Ligjit Nr. 06/L-048 për Këshillin e Pavarur Mbiqyrës për Shërbimin Civil të Kosovës, Kolegji vendosi si në dispozitiv të këtij vendimit

Vendimi hyn në fuqi në ditën e nënshkrimit nga Kryetari e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda, A.nr.399/2022, datë 01/06/2022

Sabile Avdyli

Sabile Avdyli
Zyrtare e Lartë për Bashkëpunim Profesional



Vendimi i dërgohet;

- ❖ Kompanisë
- Prishtinë;
- ❖ Kryeministrit të Republikës së Kosovës;
 - ❖ Ministrit të Ministrisë së Punëve të Brendshme;
 - ❖ Sekretariatit për Koordinim në Zyrën e Kryeministrit; dhe
 - ❖ Arkivit të KPMSHCK- së;

